



DEO OPTIMO MAX.
UNI ET TRINO,

VIRGINI DEI - PARÆ, ET S. LUCÆ
Orthodoxorum Medicorum Patrono.

QUÆSTIO MEDICA,

CARDINALITIIS DISPUTATIONIBUS
*manè discutienda, in Scholis Medicorum, die Jovis sextâ mensis
Maii, anno Domini M. DCC. LI.*

M. BENJAMIN - LUDOVICO LUCAS DE
LAUREMBERT, Doctore Medico, Præside.

An cervisia potus saluberrimus?



I. D conditoris nostri ineffabilem effert sapientiam, quod
eadem causa quæ corpus destruit ineluctabiliter, simul
etiam destructum reficiat eadem operâ, per esculenta
& potulenta: hinc perennis horum necessitas ad vitam
& corporeæ molis incrementum & conservationem. At
cum non omnibus omnia ex æquò convenient: ea seligenda sunt,

A

habitu imprimis ratione sexus, ætatis, temporis, soli, regionis, secundæ aut adversæ valetudinis : alia hominum, infantium, juvenum, mulierum, virorum, sanorum & ægrorum. Alia hyeme, alia æstate, alia populis diversarum regionum, ad Orientem, Occidentemve, ad Meridiem aut Septentrionem degentibus. Quàm pauca præter cervisiâ invenias potulenta quæ convenient totî ferè humano generi, omni sexui, ætati, tempori, regioni, & quæ in secundâ & adversâ valetudine tutius adhiberi possint. Medicinæ est (quam meritò dixeris salutis humanæ præsidem) sanis quiddè corporibus & ægris, talem potum ubique promittere & exhibere.

I I.

VETUSTISSIMUM potionis genus cervisiâ, ex Athen. l. 1 & 10. vocatur vinum ex hordeo, Herodoto *δινον ἐκ κριθίας πεποιημένον*, Teophrasto *δινον ἐκ τῶν κριθῶν, καὶ τῶν πυρῶν* : Gallorum olim, nunc Borealium populorum nectar, ex hordeo & tritico ad hunc modum optima conficitur. Frumentum aquâ maceratum donec intumescat, acervatim repositum, germen emitit, furno exsiccandum imponitur ; tostum, in crassiorè farinam molâ redigitur, vel aquâ coquitur, vel fervidâ tantùm irrigatur ; colatura, lupuli floribus injectis, iterùm coquitur ad minorem ipsius amaritudinem : hoc decoctum, rursus colatum ac repectum, fervet adjectis cervisiæ facibus ; deindè doliis infusum ad domesticos usus reconditur. Ut panis ex frumento cibus saluberrimus, sic cervisiâ, genuinus tritici fœtus, aut, ut itâ dicam, panis liquidus, potus est saluberrimus ; illius & hujus maximè miscibiles & sibi invicem proportionatæ particule utpotè homogeneæ, facilius unâ in stomacho concoquantur, facilius unâ transeunt per ductus chylicos, & juvante figurarum similitudine permeant melius vasa nutritiôni inservientiâ, & unicuique parti ad quam deferuntur ad incrementum & nutrimentum, assimilantur & uniuntur perfectiùs ob suâ conditionis analogiam.

I I I.

NON omnis fert omnia tellus, non ubique eadem salubritate donatur cervisiâ : differentia major à frumentis, aère, locis, & aquis ; inter exoticas, optima Bruxellensis, Harlemenensis ; crassior & gravior Amstelodamensis ; gratissima Londinensis ; fortissima Hannonenensis. Verùm ne peregrinis invidas, domesticis contentus, quas ames habet tua Lutetia cervisiâs, nymphæ patriæ, arti, solo, & opimis Franciæ frugibus obsecundantes, largiter ef-

fundunt latices poculis aptos cerealibus. Elige quæ conficiuntur ad superiores & proximas Sequanæ ripas, talis est ea quæ ad fanum divi Antonii, tum & ea quæ in suburbii Sancti Victoris & Marcelli ex rivo dicto *la Bièvre*, illac præterfluente præparatur; his bonitate proxima est quæ in suburbio Sancti Germani, decliviori immensæ urbis loco, scaturiente in puteis aqua, ex alluente Sequanâ coquitur. Multi hunc potum non tantum flocificiunt, sed ab eo abhorrent inscii, si spumescere videatur; calce, vel alumine, vel saccharo, refertum esse falsò clamitant: sufficit si cervisia benè cocta, fermentata, & defæcata, ex hordeo, vel tritico, & lupulo fuerit confecta. Moderatè refrigerat, nutrit; in Septentrionalibus plagis datur infantibus adhuc lactentibus puls seu pulmentum ex medullâ panis intritâ & coctâ in cervisiâ; quod salubritate superat nostram pultriculam farinaceam & lacteam, deficiente fermento, infantilis ventriculi & intestinorum tortorem. Lenissimum & benignissimum continet cervisia fermentum, sitis domitorem potentissimum. Ejus spuma siligineo panis nunc & antiquitùs adjecta, hunc & leviolem & salubriorem efficit. Hæc te soletur quod frumenta nostratia, Asiaticis inferiora, ad concoctionem & nutritionem fermenta postulant. Hoc habet Asiatici frumenti bonitas, ut rejiciat corruptivam fermenti admixtionem, & extemporaneum & boni succi suppeditet panem.

I V.

MULTIPLEX cervisia ex multiplici coctionis gradu, ex majori aut minori frugum copia; sed ea melior censenda; quæ tenuior, confecta vel Martio & Aprili mensibus, vel temperato cælo, non acescens, nec recentior, nec vetustior, atque omni tempore Parisina præstat. Imò absit illud anilium effatum, quo innuere multi audent, hunc potum fucificandum esse dum fructus purpurâ induuntur. Illam ægris & febricitantibus securus propina, pitissannæ vulgaris & jusculorum vice. Pitissanna vel lentore alvum astringit, vel suo pondere & humiditate movet, laxatâ ventriculi compage, intestina & venæ omnes accipiunt inimicum imbre, nimisque fatiscunt; hinc hydropes, hinc contumaciores morbi. Juscula ex dissolutis partibus carniû sulphureis confata, febrilia incendia non minuunt, sed augent, non restingunt sed accendunt, ægros non tam nutriunt quàm lædunt. Mirare quos homines ferunt & alunt septentrionales plagæ omnes penè abstemia, proceros, robustos, oris formâ & colore eximios, integrâ corporis constitu-

4

tione præstantes, ultrà vires fortemquè senectæ, nervorum & articularum vitiis, calculo renum & vesicæ tormentis rariùs obnoxios.

V.

VINUM laudent sapientiores ut pharmacum lætificans cor hominis, laudent & illud Baccho devoti clientes, quos juvat violentiâ vini conturbare animam corpore in ipso. Voluptuarium tamen venenum sitim accendit auctâ bibendi aviditate & voluptate, & dum limpidissimo suo liquore partes proluendo mollior humectare videtur, doloso ardore succendit insidiosus hostis. Qui vinum non odit, amet, ô Neustria, tua pomacea, nobiles vappas, factitia vina, citiùs acescentia. Canat verò Pindarus *ἄριστον μὲν ὄδιον*; sed ut primùm in elementis ὁ δὲ χρυσὸς *μενδροπος*; sicuti aurum pretiosissimum in metallis. Aqua imbecillissima vix alit, hoc norunt hydropotæ, cocta tumultum leviolem feret stomacho. Potent suas lymphas limonibus & saccharo conditas Mahummedi asseclæ, quos vini abstinentia armis potentior fecerat terrarum dominos. Potent & Sarmatæ & Poloni suum non innoxium *ὀδρόμελον*: ista habent suas dotes, sed suis vitiis & damnis quandoquæ infames, dulcia se in bilem vertunt, obstructifquæ visceribus ut plurimum nocent. Si quæ alieno vitio cervisia ferat incommoda, hæc suâ virtute innumeris compensat commodis; degeneres potus, constans & inemendabilis arguit improbitas. Cervisia temperat viscerum æstus, nimis calida & sicca corpora emendat suâ humiditate; nimis humida & frigida amico & leni suo calore fovet; molliora benigno lupuli amarore firmat & roborat; fortior, extenuata magis ac magis refocillat & nutrit.

Ergò cervisia potus saluberrimus.

Proponebat Parisiis CLAUDIUS- JOSEPHUS GENTIL;
Biluncinensis, Saluberrimæ Facultatis Medicinæ Parisiensis
Baccalaureus, A. R. S. H. 1751, A SEXTA AD MERIDIEM.